



责任审校 熊东遨

熊治祁（5首）

岁末寒烟招饮分韵得春

寒风凛冽孕阳春，世事纷纭日日新。
清夜琼楼宜痛饮，座中俱是素心人。

冬日江山看不真，草枯柳瘦盼回春。
窗前梅报芳消息，顿觉敲诗倍有神。

嚶鸣湘水出群伦，刊落华靡见大醇。
缀玉联珠歌治世，诗人着手便成春。

重访江永千家峒杉木园

昔年曾折溪边柳，今日来寻梦一痕。
流水无情人已杳，我于何处可招魂！

探访农家醉复醒，归途久驻峒前亭。
夕阳恋晚悬天际，回首都庞一发青。

熊东遨（5首）

浣阳道中联句

汉唐风雅地，把臂复同游。
盛世元无忌，余年亦好逑。
乐随千里月，来赏一川秋。
莫谓蒹葭老，根为我辈留。

荔湖夜话同长青诸老自集芜句写怀

话到鱼龙寂，天开一镜幽。
云轺经碧落，星月共沉浮。
事隔洪荒远，能从故旧游。
清时饶至味，会意在林丘。

围头湾海岸先游后饮归赠诸同道

白头翻旧梦，豪气未全消。
坐石观金岛，催诗用酒瓢。
难能风雨息，况是友朋招。
饮到街声静，推窗听海潮。

冬日偕文成诸友饮后登天顶湖眺百丈

一点豪情老未休，清湍直溯到源头。
瀑飞绝壁珠成串，诗钓重湖酒作钩。
童趣居然能再拾，年光仿佛见回流。
凭高静待风雷起，生气何愁失九州。

小雪后一日重泛楠溪江

万象浑涵一鉴清，野槎同泛有良朋。
滩前响白鱼飞箭，郭外垂红柿掌灯。
抱石云开三五朵，叠波天闪百千层。
歌余坐对芦花雪，小杓分江我亦能。

吕可夫（5首）

登巴东巫峡口鸟瞰万里长江第一拐

缆车登绝顶，渐隐白云中。
碧馆长江练，清吹深峡风。
千寻人可上，百折水犹东。
遥望巴山邑，苍茫数点红。

乙巳躲伏

避暑无良计，寻幽入野村。
摇莲风色碧，动竹雨声浑。
蝉静枝阴屋，床凉溪绕门。
鸡声惊午梦，醒弄小孙孙。

乙巳春分赏油菜花

黄金谁垒赛春台，野陌层层叠叠开。
蛱蝶嫌贫蜂慕富，纷纷转入菜花来。

腊八日登武冈云山

西风割面岭云寒，上下天梯腿半残。
到得峰巅回首想，登山未比做人难。

乙巳重午记事

锅碗瓢盆老少忙，稚孙跟尾入厨房。
忽闻好苦童声唤，误把晶盐当白糖。

杨立新（4首）

除夕

少年回望隔天涯，雪落茫茫何处家。
正是人间辞岁日，侧身天地看梅花。

登吴山城隍阁

万里风烟百尺楼，落桐声里又逢秋。
湖山幸可娱青眼，鸥鹭何曾悯白头。
异代车尘如矢射，经年槐梦等云浮。
人生合此开襟抱，欲拍栏杆兀自休。

温岭戚公祠

纵横一剑立奇勋，未及封侯天下闻。
万里域疆无抗手，满朝人物独推君。
功名碑老湮文字，烽火台空屯海云。
四百年来波未息，人间犹重戚将军。

沪上

遥看沪上势如煎，只手凭谁解倒悬。
万户恐慌封道日，满城空寂落花天。

事非关己皆慷慨，命到由人俱苟全。
盛世弦歌犹彻耳，白衣执甲已三年。

杨宗义（5首）

暮春过湄江二首

眉峰舒展眼波回，隐约仙人洞府开。
亦欲武陵舟上坐，清风为送落英来。

路缘溪岸几迂回，花不知名随处开。
未解清流出山意，风尘客已入山来。

宿浏河第一湾农庄

第一湾前第几桥，水流云在客愁消。
晚来山雨浇头罢，卧听溪声似海潮。

与诸友同登大围山

山根盘径上，云脚向人开。
晴雨时交变，烟光任剪裁。
岭雄三楚界，峰峙七星台。
已称登临意，良朋况共来。

大围山栗木峡

徒步栗木峡，阴阴风自凉。
岩泉交响乐，花树各分香。
笑说游人懒，时依水槛长。
偶然临此境，浮世尽能忘。

周永红（5首）

大同古城

经略城池话昔贤，坊间剩有口碑传。
一官归去尘埃里，万客来参石窟前。
自古能臣多贬抑，只今廉吏少升迁。
乌烟荡尽黄沙逼，谁为苍生解倒悬？

悬空寺

招提天构渺悬空，峭壁千寻造化工。
佛海亦尘云始帚，禅关不镜月初弓。
八风鸟道催人急，半日驹光过客匆。
自惜百金聊退步，还归独笑鬓双蓬。

平遥古城

崔嵬城堞立平遥，鳞栉骈阗访旧朝。
鏢局钱庄闻叱咤，金钗玉钿见妖娆。
缤纷市肆飞花样，凄恻村墟插草标。
膏血楼台供戏乐，莫将郑曲认虞《韶》。

平遥县衙

入望衙门八字开，输金贾券进门来。
衙冤有理无从诉，射利非常枉自猜。
暗室可怜难仗义，明庭堪羨独饶财。
休言七品芝麻小，十万花银媿道台。

王家大院

绣闼雕甍簇画梁，檐牙飞啄过宫墙。
陶圭往迹簪缨显，王谢遗风闾閻昌。
直道曾经敦孝弟，横财依旧裕官商。
迩来价重游人织，盆钵丰盈贮孔方。

陈樵哥（5首）

重上岳阳楼

衔吞仍在望，楼阁面湖开。
浪卷沉沙起，蝉嘶酷暑回。
古今新特色，忧乐旧平台。
荣辱兴亡史，循环入梦来。

张官高速古城山隧道二首

亘古雄关镇大荒，牛羊出寨九回肠。
神仙袖手愚公叹，世代边民锁一方。

时凿时疏一邃长，穿崖贯石极辉煌。
十万大山齐呐喊，排除万难出官张。

麻溪茶马古道二章

青石苍苍印古谣，四时风雨马萧萧。
边荒莫道征途险，深浅蹄痕岁月雕。

今来不见古猿啼，两岸依然旧柳堤。
山月晴辉相映好，高科筑路过麻溪。

周燕婷（5首）

车行锡崖沟挂壁公路

不用移山路已通，天工人力一时同。
泉声绕壑光明灭，身在桃源洞府中。

王莽岭散花台写意

不负林花不负诗，敢因诗就怨花迟。
花开盛日香犹在，诗注清流晚更宜。

华容古道

千秋流水逝，未改绿荫长。
世路平兼仄，人生热亦凉。
呼风林下鸟，坠露叶边香。
嗟此清幽地，曾经是战场。

秋过回雁峰

未尽当年忆，相思片叶红。
往来云似盖，南北影飘蓬。
梦远难成约，楼高不碍峰。
寒枝摇落处，何忍问西风。

春泛小漓江

清游不是载愁船，杨柳新生串串烟。
日色初随梅子暖，春声暗遣鸟儿传。
流波百折终归一，积翠三分更望千。
天自融和人自健，只怜诗债欠年年。

刘清天（4首）

至京口受聘江苏科技大学教授诗以记之

入暑发江东，驱车谁与同。
跨城崇礼聘，隔座话诗逢。
名慕南徐壮，星垂北固雄。
登楼时一眺，帆挂满清风。

揖别徐州次煌兄韵

挂帆盛会结行游，浩荡春风越岭头。
健笔锦贻戏马壮，云冠香近燕姬柔。
纵谈啸动黄楼鹤，揖别牵添赤帝州。
聚散文星杯酒以，海天光霁不言愁。

清明返九江汪开华兄招饮

将军护镇古浔阳，八里湖边宴十觞。
曾是长安车马客，近来偏爱贺知章。

读《仿佛词》寄韦散木兄

艰于桂岭玉于京，无量春愁著姓名。
独鹤去来相问讯，抟云仿佛眼前倾。

张建明（5首）

夜过武冈老城遇白喜事

灯奇色不新，老味系漂萍。
木屋斜中稳，招牌朽处亲。
临街当大事，哀乐恻游人。
只此平常态，风情入本真。

甲辰暮与湘馆诸大佬登云山未及绝顶而返

笔墨酣余逸气賒，便生豪兴向峰丫。
林风问屐轻还响，石径扶云曲更斜。
拄杖梵音传胜力，开怀笑意作山花。
紫霄犹在抬头处，腿足无能借梦爬。

乙巳春日访墨兰堂

驻足生疑窦，凭篱欲问堂。
南风知有客，北苑送余香。
案墨园兰趣，林荫野水庄。
闲谈昨夜梦，无酒亦堪狂。

瘿榼

无争世利自相宜，日下星边首不垂。
笑共樗癭游且乐，老来全得一身皮。

壶瓶山泛舟

湘天梦老楚山幽，懒卧深溪不系舟。
石上波翻欢且急，松间鸟唱隐还柔。
云来满壑飞闲白，雨过千峰挂碧旒。
兴起邀风成一醉，管他鹊喜与猿愁。

罗冈（4首）

梦雨轩仿骚体作《浪子歌》见示

吾羨北溟鯤，吟哦拭酒痕。
拂衣挥易墨，把剑看星文。

直木栖恬翼，高轩却俗云。
情多身是累，慎莫作诗人。

读《佛呗涛声》和陶俊新先生韵

东篱载酒自由身，笔挟风雷信有神。
佛呗涛声常在耳，沅江新雨一犁春。

潘峰兄师生书法展致贺

逢人说项忆相知，风雨江湖酒一卮。
来看芬芳桃李盛，老枝遒劲绽新枝。

赠篆刻家谭石光师兄

最爱云笺简帛书，一挥铁笔任驰驱。
冲披削切翻新面，石火流光叹不虚。

张劲松（3首）

游石燕湖公园

绿水青山好浣春，虹桥飞跨碧波鳞。
栈连今古游人乐，未饮琼浆已醉神。

寻友

电号常遗久渺茫，古稀失侣断愁肠。
梦寻沙径踪犹杳，车载银屏路自航。
矮巷炊烟凝旧忆，凌霄铁厦矗穹苍，
穿求阡陌终欣见，共话斜阳胜药汤。

微信亲族群

故旧飘零似散沙，微群牵系聚天涯。
乡音字字亲情暖，祖德绵绵泽万家。

曹春华（4首）

夏日

云天澄霁见分明，叶里金蝉竭力鸣。
乘物无聊消盛暑，弄弦兀自尽余情。
抚成心曲浑如梦，捻断冰丝亦有声。
逢世但求身独善，小添确幸坐风清。

新年寄愿

不求富贵不求仙，遇事三分顺即圆。
稚志青衿欣抱梦，牛衣鹤发乐于田。

寄心只在高云外，望笛长横明月前。
时有鸥盟能约酒，清欢一盏复年年。

平安夜

西望斜阳入画栏，一年光景又将残。
万千破事孤身战，无限愁心自己宽。
对酒悄然吞苦累，逢人只是道平安。
向春犹待花魂醒，冲破严寒岭上观。

自题

走走奔奔年复年，挑梁力在女人肩。
修身已断三生梦，入世深参五味禅。
乌鬓熬成青间白，红尘看惯缺和圆。
由来万事随缘法，漫数春秋任自然。

陈伯玲（5首）

闻国芳老师沅陵赁居把钓

轻风澹荡锦鳞鲜，赁得幽居便结缘。
把钓早知庄子趣，沿溪又到太元年。
几家鸡犬迎篱下，十里云霞漾藻边。
更喜月华能解意，随波良夜送归船。

春分后两日闲游

敞襟还喜午风频，缓步来寻陌上春。
摇曳柳丝悄转绿，啁啾禽语又添新。
物华合得闲时趣，胜日何妨客里身。
料是故园花亦盛，缤纷探牖正撩人。

南湖

澄波吹皱带轻寒，曲岸回廊接浅滩。
留客花初红照水，争春柳待碧垂杆。
漫寻榭槛危边坐，好向湖心深处看。
想见当年烟雨里，一船风发正生澜。

上元前夜不寐听雨

最难风雨四更眠，料峭春寒卧默然。
世相离奇归大梦，衾窠反侧是中年。
银花火树谁从乐，旧辙岖途自着鞭。
明日汤圆滋味里，车泥一径向南天。

橘子洲

风物相邀接履游，冬阳和煦照江洲。
湘流浩渺遥闻瑟，岳麓斑斓莽胜秋。

膜拜万民标胜迹，沉吟千古觅孤舟。
波涛不尽苍茫意，来洗诗人落落愁。

贺德荣（3首）

元旦

开轩清气满，早起一如常。
杖叩溪头暖，风沿岭上香。
坐亭匀雅趣，依竹剥飞穰。
还是家乡好，宽和福寿长。

童趣园与孙同乐

侵早闻微信，乖孙约外公。
老儿先备力，顽仔总来风。
双跑追云梦，单飞蹦太空。
归来两不似，唯有此心同。

南郊吟

我是南郊主，天天去又来。
只因清气立，肯让野花开。
有水沿新竹，无尘烁古梅。
林间闻鸟语，欢喜不须猜。

黄初（4首）

麓山雅集得寒字

登临绝顶倚天寒，水墨平铺一线宽。
扫尽烟霞空眼底，与君共醉白云端。

萍飘十余载同门相聚长沙与诸师友把酒言欢感作

也叹浮生梦里长，相逢笑指鬓边霜。
流萍此去虽无定，却认潭州是故乡。

读书会感怀

闻笛起沙鸥，风烟柳岸楼。
时时车马过，隐隐舶舟浮。
逸共书声出，闲随墨海游。
功名身外事，一酌看江流。

除夕感怀

驱车三百里，日暮到犀城。
一路烟霞翠，万家灯火明。
应知异乡月，不解故山情。
夜半钟声起，风飞雪又横。

黄去非（4首）

乙巳马日拜双亲墓

年味醇浓酒正香，墓前瞻拜痛肝肠。
团圆旧事从头忆，寂寞新碑刺眼伤。
几树梅花将灼灼，一溪春水渐浪浪。
衷心愿托山间鸟，好伴双亲到海桑。

刘腴深教授一百四十周年冥诞书感兼致浏阳诸君子

十子同光惠泽深，岿然天隐出浏浔。
燃藜旧业公能绍，讲座名山德可钦。
世路艰难资啸咏，文章炳蔚灿璆琳。
杨花故地今非昔，足慰平生万里心。

乙巳仲春平江木金赏油菜花并于 余氏家庙听琴兼呈益红女史

胜日阳和拟澍霖，木金更喜地生金。
黄花灼灼佳人闹，绿水悠悠翠色深。
愧我萧疏酣纵酒，多君娴静笑弹琴。
岿然庙宇供瞻拜，更醉梁间《韶濩》音。

重过鹿角怀吴士迈其地尚存“吴退菴施粥处”残碑

记得当年敦善堂，重寻旧迹感沧桑。
一碑斑驳铭施粥，百战艰难痛掩光。
故国春深花树灿，鸪原事在子孙昌。
骛骛岁月频回首，不废高名动万方。

赖玉怀（2首）

甲辰大寒天暖

未觉严寒至，阳春倒是先。
金蛇随背后，喜鹊戏梅前。

年嘉湖赏梅随感

年嘉湖畔暖阳灿，梅绽莺欢笑语喧。
素艳娇颜当傲雪，幽香淡雅定馨轩。
诗吟画赞凝疏影，志远情浓入国魂。
莫道人生如过客，且随翰墨共晨昏。

雷凡（3首）

春行

久雨逢晴好，呼人作野游。
草青舒老目，雀唱近山楼。
行与香风伴，坐听溪水流。
日高返城去，杏蕊满肩头。

霜

昨夜穹悬月，晨来漫野银。
草枯披缟素，天净少埃尘。
日上三竿赤，畴犹一色匀。
飞禽无畏冷，兀自戏河津。

乡居乐

细雨酥风入旧家，东篱竞发早春花。
诗吟新种池边柳，歌听高鸣井底蛙。
纸面文章随意改，堂中高座任人賒。
庭前牖后俱归我，乐度余年享物华。

李瑞河（3首）

夜登越王台未果

少小书中识霸才，匆匆欲上越王台。
星笼杰阁望难尽，树隐高城叩不开。
家国千秋终幻梦，英雄一样没蒿莱。
清游每起兴亡叹，吊古闲心百转哀。

夜宿老家

山头日沉久，树上鸟栖深。
有致思旧貌，无聊观抖音。
风平晶露重，草盛乱虫吟。
一脱樊笼后，逍遥任此心。

柳永故居遗址有思

首将长调被丝弦，千载犹传锦绣篇。
泉下若知身后事，倩谁再唱鹤冲天。

李雄中（2首）

车过荷塘

车行深处疑无路，月色揉波送藕香。
桥卧柳湖通曲径，萤飞碧叶走星光。
风扶华盖仙姿舞，露湿红妆野趣藏。
回首荷塘烟霭里，梦魂萦绕水云乡。

从深圳运荔枝到长沙

莫道黄田连海涯，晨光摘荔午长沙。
当年妃子钟情物，今日寻常百姓家。

李意坚（5首）

壶口瀑布

浊水崩洪怒作声，千年未见几回清。
寻常赢得非凡势，原是人间地不平。

王家大院

庭院深深楼阁高，通天富贵起秋毫。
百年人散空如也，依旧门前发绿蒿。

自长沙抵湘西八面山

万山新翠叶初齐，百隧连穿过五溪。
车向白云深处驻，夕阳正下武陵西。

浏阳新安桥

青山郭外水云遥，信步丘园过短桥。
石板痕深烟树老，一隅风物忆前朝。

夜宿浏阳河第一湾

苍苍野色四围山，九曲浏河占一湾。
就枕滩声听不绝，酣然清梦水云间。

刘建中（3首）

青山桥采风

青山着意银山出，产业兴隆创业情。
桥上沟通心上美，野珍移向室中生。

访驰瑞隆隆菌业

桥对青林近，尝鲜菌又生。
可来亲手摘，不必漫山行。

乙巳春访新化天门乡土坪村

车入林争拥，峰回雾巧藏。
善溪流画境，云上览珠光。

刘与权（2首）

咏永春香

缕缕轻烟上碧空，氤氲浮动玉皇宫。
但知此物非凡品，未料人间有巧工。
六合云霞皆觉爽，八闽事业赖兴隆。
永春一道新名片，香透全球不世功。

宁乡

中华强市数宁乡，自古商周蕴宝藏。
铙钹余音千里远，尊罍陈酿万年香。
宋儒南渡弘文学，洧水东流壮海洋。
无限风光于此聚，宜居宜乐傲儿郎。

罗金龙（3首）

王船山湘西草堂

家国兴亡未敢忘，千秋事业在文章。
石船山下苍苍柏，犹伴先生旧草堂。

游善卷故里次周必大德山韵

消闲共入山，重到朗江湾。
楼傍清阴里，鱼游翠影间。
先生坛尚在，我辈径犹攀。
饱吸烟霞气，他时肯再还。

返乡有作

五月熏风好，携儿返故庐。
藤长瓜满架，巢稳燕安居。
草色侵阶上，荷衣出水初。
鲜蔬含露摘，烹罢味何如？

求灿霓（3首）

赤山岛访杨嗣昌墓

大湖形胜抱牌楼，异代烽烟息此丘。
宰木新碑遗世劫，砧身宿草故山头。
一生毁誉缘三策，百战安危系十州。
蒿目郊原无限意，西风落叶洞庭秋。

南岳大善禅寺

唐基宋础护真如，梵刹延开魏晋茔。
檐翼挑星眠宿鸟，炉烟化雨润新蔬。
客携湘月参禅偈，僧剪衡云补衲裾。
莫问沧桑几回劫，塔铃仍诵法华初。

访印心石屋摩崖

雨蚀风侵迹未销，字沿凿线又新描。
渡江云衬文澜塔，印石心铭岸畔礁。
一段恩荣凝剑壁，百年人事化秋潮。
客来久踞高岗上，草树斜阳入望遥。

田翔玲（1首）

春游岳麓山

胜日寻幽境，层峦叠翠明。
林深啼鸟脆，溪浅落花轻。
古刹藏云影，危亭接晓晴。
登临心自远，风送楚江声。

王朝晖（2首）

题别兵营四十年

荆棘盈阶梦已阑，哨楼回望祝平安。
兵营一角芭蕉树，草垫沙包月照残。

春日遣怀

零星细雨洗青螺，春树何须渭北多。
说到江东新旧酒，也曾一盏醉村婆。

魏勇（4首）

村居

未觉田园寂，村居一首歌。
茶余闻涧鸟，醒睡见青禾。
菜圃时蔬嫩，莲池菱藕多。
此间含至乐，莫谓日蹉跎。

重阳诗会团头湖采风

时序逢重九，诗心作野游。
广邀青眼客，同踏镜湖秋。
稻熟金掀浪，天蓝水接鸥。
青春虽易老，不老是乡愁。

过惠州苏轼故居

岭南二载渐忘忧，喜筑新居慰白头。
不使先生春睡美，惠州千里又儋州。

游洪江古商城怀古

南楚名城安在哉，寻幽独上望江台。
楼依地理层层列，水裹财源滚滚来。

蔽日云帆何处觅？怀春野卉傍墙开。
荣枯世事真难说，怅望青山意不回。

文永龙（3首）

贱辰前日山中伐木忽觉春之近也

渐起东风不自禁，身心放逐向幽林。
山禽对唱成诗韵，溪水悬流胜楚琴。
雪后梅花新积玉，坡头油菜漫铺金。
堪堪信步聆清籁，拾取青春入梦深。

六十初度书感

梅开几度着霜痕，身骨凝寒意气浑。
老牯思耕犁轭旧，苦心琢石雪泥温。
梦谳风雨嗟长夜，险涉旋涡合断魂。
悟透农村天地阔，凭轩无语对黄昏。

木槿花

不占芳丛二月春，朝开暮谢亦精神。
娇妍岂肯沽身价，但把柔情许与人。

萧志国（1首）

游赤壁

石裂犹含火，江清可鉴兵。
风吟千载恨，浪叠一声惊。
谁解周郎笑，空传苏子名。
沙间寻旧迹，苔色上新城。

谢良健（2首）

观筷子篓瀑布

不觉山高冷，唯看绿意横。
花香闻旧韵，日色弄新晴。
何事烟冥起，飞流梦易惊。
天然灵气荡，疑似到蓬瀛。

夜宿神农谷

避暑山庄好，清幽胜境开。
千峰衔翠色，一榭卧苍苔。
鸟悦穿林唱，霞蒸入画来。
逍遥忘酷热，心旷任云裁。

谢紫云（3首）

过南楼

全新三义井，苏式旧南楼。
花白官槐在，墙红日影浮。
曾居大人物，长念郭亭侯。
青史凭谁说，唏嘘七十秋。

甲辰岁末吟

年华暗换日悠悠，云卷云舒任去留。
屋外寒梅清到骨，镜中白发气还遒。
拈毫临古二王帖，听水观涛一叶舟。
微信能知天下事，俄乌血战几时休？

望衡亭漫兴

片石沧桑古韵浓，霜侵浪袭立长空。
壶山弄色团团绿，菡萏分香岁岁红。
望岳听涛于物外，声留过雁入云中。
锦湾名刹钟鱼晚，万里归船万里风。

易尤凤（3首）

白沙井

沙水久名扬，清泉市内藏。
泡茶茶美妙，酿酒酒芳香。
多少任人取，盈枯无季荒。
几经时代变，木桶换瓶装。

访左宗棠故居柳庄

柳庄何处是，湘北问农人。
自盖山间屋，躬耕垄上春。
隐居书读破，出仕局开新。
诸葛胸中智，危机国重臣。

夏荷

碧水蓝天夏盛开，香风解暑送凉来。
世间花朵唯君好，愿做蜻蜓夙夜陪。

李静（5首）

学剪纸

真个无情化有情，素笺金剪斗轻盈。
愁如飞雪纷纷落，一幅春光渐次成。

王船山故居见藤龙

欹松侧石古藤斜，岁岁蟠枝绽紫花。
不逐青云化龙去，孤心相守故人家。

车发岳阳

一叱银龙过万山，迷蒙细雨带春寒。
思量浩渺烟波处，几点青螺待我看。

至君山雨霁

来学涪翁一笑先，舟中遥对翠如烟。
可心最是君山雨，为见诗人自卷帘。

冬叶

一夜寒风万叶鸣，翻飞如蝶舞姿轻。
飘然相伴雪花落，来听春天脚步声。

胡晖（5首）

自驾黔东南道中

携得千峰翠，秋高何以论？
此间除我外，尚有白云奔。

落基山脉冰川

天公此处赐孤高，圣洁终年雪不消。
唯有白云情缱绻，风寒无畏抱山腰。

高铁过信阳

杨树枯黄薄似纱，棉田叶绿未开花。
此间物我俱为客，一在风中一在车。

癸卯小暑后两日登麓山

逃禅今又过林泉，忘却城东小暑天。
待看苍松长独立，何凭柔蔓默相牵。
扶杯慷慨倾将尽，隔叶嚶鸣听未全。
我纵胸中有丘壑，此时皆被白云填。

读史有感

开卷元知道不孤，庖丁未必久为厨。
大风歌哭非关楚，太史文章岂与吴。
爱恨人哀《羽衣曲》，清明谁得《上河图》？
可怜夜宴韩熙载，醉里三分只若愚。

程敏（5首）

中秋前后连日霖雨十六忽见满月

日日窗前雨，蟾光空自期。
忽然山吐出，恰在最圆时。

三峡人家龙进溪即景

软荇纤藤俱有灵，花开石隙静无声。
穿山一线溪清浅，黄叶眠沙隔水晶。

无题

千年沧海肆横流，阅世平添杞国忧。
漫说支天凭砥柱，天倾总压小人头。

凤凰城夜坐

青瓷凳子晚风虚，小阁清凉爱水居。
十里沱江灯占尽，一天白露冷星榆。

游苗寨见蚩尤像

酹酒谁招自古魂，竹竿歌舞送晨昏。
曾经战血玄黄地，剩刻头颅悬寨门。

汪凤岭（5首）

宝岛行吟（选五）

转机往北日初曛，右盼舷窗岫出云。
一幅绵绵中国画，谁开秀色问东君。

新竹旧闻苗栗风，当年瓦砾陷飞蓬。
我持一票南投去，再拜台中不倒翁。

小岛如丸名姓多，一朝一代感蹉跎。
浮田簇拥双龙起，捣杵谁人逐逝波？

玄光寺眼最宽柔，山色不空含碧楼。
人去尝鲜行迹在，小鱼一尾识乡愁。

一树高开有主张，洁身孤傲不言伤。
吐来粒粒鲜明色，独把丹心对艳阳。

郭庆华（5首）

抗战胜利 80 周年纪念日追怀燕赵诸先贤

烽火幽燕鼓角鸣，骚坛血染太行旌。
邓公泼墨诗为剑，聂帅挥戈笔作兵。
一段峥嵘存浩气，千篇慷慨振金声。
而今莫道周边静，擦掌随时待请缨。

题城南庄革命纪念馆油画《夜以继日》

耿耿星临不夜天，一灯似豆照无眠。
江山有待归高手，战地还须著祖鞭。
笔下风云凭掌握，胸中兵马任周旋。
而今画入丹青里，身影宛如回眼前。

题裴希敏先生画《青山拥翠尽朝晖》

先生翰墨得天真，满纸烟霞气象新。
傲骨支撑山势力，虚怀流露水精神。
暂无雨意云招惹，别有风情树贴亲。
从此翠微供养眼，画屏长驻是青春。

题红叶

冷艳高标不染尘，枝头秋晚更谁亲。
深情只待飞霜到，仰面随他点绛唇。

自题铜板浮雕头像

脱壳金蝉假亦真，象形为主我为宾。
从今不怕风和雨，已是千锤百炼身。

曾俊甫（5首）

晚返勗盒二首

天涯旅食自年年，岁晚归来重惘然。
容膝一椽仍仅得，闭门此日只孤眠。
风尘恐倦嗟于役，筋骨能顽凑利钱。
回首平生多戒勗，数杯欲醉乞闲缘。

隔牖烟花次第开，东君消息过寒梅。
不须作客愁王粲，正欲娱亲效老莱。
薄酒尚须谁与共，嘉辞岂用客争猜。
高楼许住何妨久，欲隔芸窗听霹雷。

网上见溥仪之选民证

归命黔黎作选民，宠颁此证长精神。
光回衮冕趋前陛，景迫桑榆见后身。
褫褐瞻天须破旧，櫜枪扫地亦呈新。
三朝踪迹看龙种，叹息如今渐已驯。

向晚大雨

东风骤暖脱重裘，又避滂沱入小楼。
早分一春晴雨异，不妨此夕海天愁。
泥香犯屐谁相过，灯影裁书自可留。
收拾幽怀梦岩壑，断云能共故人不？

永嘉悦梅师姐惠寄《徐定超集》《翁同文文集》诸书

尚有翁徐继四灵，殷勤手把念仪型。
日长典籍新堆案，风暖馨香早满庭。
假此百城身不倦，因谁三径梦多宁。
同门厚谊重寻诵，无数新章慰眼青。

陈海洋（5首）

盘古

万物民灵溯果因，鸿蒙一辟衍无垠。
舍生方得开天地，却有庸人自作神。

晚霞

向晚红霞生似潮，漫天明艳竞妖娆。
谁知日落西山后，化作乌云压碧霄。

宿凤凰茶乡

夜来高卧白云乡，虫语星光酣梦长。
浮世经年心欲绝，暂凭仙境减哀伤。

昆明街边有蓝花楹已开半年未谢
五月楹花十月娇，生来便着紫云袍。
或怜树下蚁民苦，赖在枝头不肯凋。

李自成败走山中掠食时被老农以锄挖死

大义高言未解疴，尘寰夺食命如何。
留香青史莫深看，不过新魔换旧魔。

尤悠（5首）

暮春河行五解

掠镜飞云水铺城，一舟皱碎碧波声。
声声似解幽人意，流去春愁逐落英。

光华拖水锦余漪，张捕天风宕柳丝。
鸚鵡声过云待泊，春愁忽谢忽开时。

照影摇波蒲柳姿，扶风一榭簸琉璃。
江鸥飞入斜阳满，人立花深水涨时。

江风澹荡暮春天，渐入回舟水拖烟。
衣带渗簪瑶草碧，动谁花泪证山川。

吹皱晴风梦几程，云帘挑落水交横。
行舟去处修禅定，万籁收于一滴清。

顾青翎（5首）

归家杂诗

岁晚难为计，曰归心事讹。
政严怜县小，疫久讳邦和。
楚甸寒方凛，湘流水不波。
长车犯风雪，今夜路如何？

车指岩江路，居人聚作村。
山光带残雪，野气到衡门。
咸豉香初泛，新蔬翠可扪。
年年携此去，惭数外家恩。

自注：外婆送肉蔬数十斤。

偶忆

别来几载断知闻，名姓逢人偶似君。
旧事小城都失色，鲜妍剩得藕花裙。

离深口号

从此南天系梦魂，蛮花犵鸟故温存。
征衫莫浣西湖水，中有伊人旧浥痕。

湖上看樱花

园禽唤我逐繁柯，水曲桥亭次第过。
夹岸雨声涸岫翠，蟠空花气压湖波。
瞢腾醉眼随风曳，拨触春心向晚多。
珍重夕阳留小驻，不须明日问如何。

李静风（5首）

自题兰花小影

倚石偕来小翠禽，看花已是百年心。
山中浑忘生如此，露冷香寒直到今。

小恙晏起手机中得诸友夜间诗句却寄

消黯红尘里，灯檠一岁残。
青霞微抱恙，夜雨猛添寒。
不意拈花指，无由拆锦丸。
徘徊天外月，键入小屏看。

蜡梅

欲就青云野鹤姿，铜瓶纸帐插长枝。
三千磬口喷香麝，一点檀心醉酒卮。

越女新妆宜带剑，洛神旧友合分帷。
世人休觅丹铅色，海月抟成骨相奇。

黄龙寺听瀑

见说龙涎带月暝，热檀冷磬独来听。
山从太古横空翠，水自鬢天倒净瓶。
丹穴槁灰方度死，白衣枯海又闻经。
谁知一钵无情泪，啸起狂潮对眼青。

秋意

幻形依世久如仇，仄室炎氛病未瘳。
一雨收兵天再赦，万虫吹气廓生秋。
少商弦外音清越，月窟仙中光漫流。
大抵尘烦刊落事，手拈黄叶入青眸。

王霏（5首）

蓉城别绪

川菜珍馐味尚醇，春熙路畔往来频。
将辞锦里情难舍，窗外流云是写真。

小年

昨夜霜花覆旧尘，檐前冰柱映新春。
炊烟袅袅千家暖，正是人间祭灶神。

游秦岭和谐森林公园

相约闲游意兴长，远山含黛映湖光。
风摇竹影添幽趣，芦荻萧萧作雪扬。

元日感怀

迎春消息雪中来，隔岁梅花次第开。
三径同敲陶令句，五湖共举杜陵杯。
人间况味凭挥洒，物外情怀自剪裁。
如水光阴留不住，任他东去复西回。

咏梅

生来自有好风骨，抱影横枝临岁卒。
素色偏宜瘦石偎，清姿独爱幽林没。
罗浮梦绕意何悠，庾岭云封情未伏。
但守孤高志不移，春回悄把真香发。

唐海棠（5首）

宿零陵二首

潇湘夜雨滴秋窗，犹是灵妃旧楚腔。
无数雁声遥过邑，碧烟青草满寒江。

独坐秋风十二阑，相思飞上碧云端。
美人长隔湘江水，抱瑟归来月色寒。

雁声

青草池塘动縠纹，隔帘相应正堪闻。
吹来吴楚千重雨，没入潇湘万里云。
别苑灯光深见阵，西洲烟水冷离群。
徐飞远去霜空里，归路茫茫怅不分。

夜坐有思

不知上界宴何人，雷走长天殷可闻。
想我读书灯下雨，是谁起舞袖中云？
寒香迥自名山出，夜色遥从大海分。
十万精灵春气里，可能随处论斯文。

藏经阁下红梅林大雪偶占

缟袂林中袭，玉痕枝上生。
幽怜花骨瘦，冷逼蕊香清。
当户山犹睡，开门画已成。
冲寒君愈怒，非独有修名。

高咏志（5首）

咏盐粒

波浪纹身岂化灰，苦咸滋味自堪回。
谁将一滴连云海，晒作人间最小碑。

山家

山家清景一番新，白发归来洗客尘。
羨煞门前老梨树，犹披风雨炫青春。

杜鹃

芳心未发杜鹃催，又逐春风一度回。
入骨相思红欲透，枝头燃尽不成灰。

假日

细浪清樽放小休，轻鸥红日漾中流。
三竿睡到自然醒，一叶漂成不系舟。

重读《论语》

千年穿越俯长身，列国周游磨薄唇。
历尽沧桑犹赤子，遍经世故老天真。

方伟（4首）

河堤小憩

毛桃紫李树交加，芳草长堤接水涯。
铺席绿荫成小睡，香樟摇落一身花。

南河独坐

独坐南河侧，身疑入辋川。
草堤青到水，风树翠摇天。
鹭影悠悠白，鱼波漾漾圆。
恨无裴迪在，同我咏诗篇。

雪中山行

山路盘盘车似飞，昨宵积雪发寒威。
树因承重枝多折，草被镶边体变肥。
老鹤携雏寻竹实，苍龙呼侣裹松衣。
人家时见云端上，石隐峰藏一径微。

游南河遇雨乃支伞帐

河上清风细雨来，青篷伞帐漫撑开。
几平方内安摇椅，近距离前即钓台。
茶盏随身肠可润，手机在掌句能裁。
唯求山木天年好，不向人间羨有材。

奚晓琳（5首）

过龙泉寺

殿影参差处，烟香缥缈时。
钟敲尘外曲，课引佛前思。
得道何须道，云痴未必痴。
山风自来去，老树发菩提。

万德寺礼佛值雨

峰高雾笼寺，山雨落重檐。
佛径花新湿，殿香风欲淹。
鸟稀闲客耳，僧老旧茶奩。
林树烟窗外，阴晴无意占。

望月

一轮出林表，长夜独幽明。
云动桂枝影，虫凉宿草声。
故人遥梦及，尘念逐年轻。
此际谁堪好，秋江槛外横。

上巳节前香炉湾滨海游园独步

晴碧岚湾海气深，缘香桃月入琼林。
采春蝶侣穿花径，逐羽鸥汀合浪琴。
园下肩摩人不识，客中杯浅意难斟。
耽行此际梦云老，一任棕风吹满襟。

整理书柜又见友人赠红叶书笺

松江凉月夜窗临，翻检流光入念深。
拈取红云枝上朵，遗成小字卷中林。

残纹断续春消息，余色依稀老梦心。
一叶廿年声未远，君听秋水我听琴。

李伟亮（5首）

夏日田园杂诗

晴补秧苗雨种花，村庄小小数人家。
暑风来去多情甚，吹熟南墙满架瓜。

杏树新栽叶子肥，耘田谁正荷锄归？
黄昏雨后蛛丝缺，时有毛蚊破网飞。

映竹蔷薇吹面风，微观世界万花筒。
墙根蚁族纷纷出，列队昂扬斗甲虫。

理罢农田未歇鞍，超龄劳作赚三餐。
村郊近岁多工厂，也托人情做保安。

街灯街角泛微黄，蝉唱声中下夕阳。
新月一钩天末白，待人睡后始生凉。

杨新跃（5首）

窗台绿萝二首

秋深未废碧萝清，闭户不知阴复晴。
纵避天恩无雨露，养成生意尚纵横。

清幽长坐觉生烟，肃气茫茫夜正悬。
毕竟草根能耐久，春凉绿到晓霜天。

会同粟裕故居后有数株古木见村人弈局于其下作绝句二首

青嶂云浮远见奇，苍然古木郁参差。
房前久伫来房后，为看村翁一局棋。

树阴石冷坐生疲，空想当年百万师。
一局楸枰终弈罢，江山眼底草离离。

湖口石钟山怀彭玉麟

异代山河吊此公，白萍秋老水天融。
衡云赣雨长江楫，初雪梅花猛士风。
百战小姑应念我，横流巨石独凌空。
江南多少征夫血，写入寒香画卷中。

郑雪峰（5首）

齐白石故居

守屋村翁豁齿牙，漫从琐事说齐家。
秋光闲着无人画，开老东篱扁豆花。

志愿军四百三十七具遗骸由韩国返葬

沈阳抗美援朝烈士陵园

赳赳雄唱气冲霄，当日风旗过大桥。
长策极矜人海战，飞鏢惊见阵云焦。
归余残骨何由辨，散久英魂未易招。
青史茫茫疑惑在，侧身东望怅难消。

衡岳忠烈祠

忠魂烈魄寄嶙峋，胜国高祠许再新。
拔地丰碑元柱石，应天名将是星辰。
青编自有董狐笔，浩气终成衡岳神。
忽尔诗悲生莽荡，西风满壑咽松筠。

雁

曾为传书到上林，鸣哀仙掌破沉喑。
未烹岂以真材幸，迅举终愁风力侵。
高缴避成穷海客，重云望死故园心。
一朝归骨雁丘小，空惹骚人弹泪吟。

小乔墓（古风）

雨扬丝，风吹片。莺语管阴晴，小径苔纹遍。湖山胜处一
香坟，草色青迷花气熏。雨里芬芳怜玉魄，风前翠碧拜罗裙。
江声淘尽英雄业，江上悠悠散云叶。烟波无际影沉沉，只有佳
人照古今。古今事，洞庭波，湖边柳，自婆婆。

陈东彩（5首）

山中

秋意入冬月，欲寒还暖时。
不辞苔径仄，来看片云移。
霜重枫添色，风微鹊踏枝。
山中闲一晌，坐到日西驰。

苏堤漫步

坡老留仙迹，吾侪重此临。
唳天鸿影杳，映水柳荫深。
试掬当时月，聊通异代心。
长堤行缓缓，凉露润风襟。

白江湖森林公园

倾泻天河水一方，溯回双桨漫徜徉。
濯缨濯足都云可，尘外来贪片刻凉。

落羽杉

迎眸霜色间青红，疑似身于二月中。
更有池杉飞彩羽，燃云照水壮秋空。

中秋偕家人出游

得逢好景一流连，不在山崖即水边。
坐石闲观苍狗幻，泛舟欲共白鸥翩。
何须习静逃方外，自蔽喧嚣到眼前。
莫笑异乡为异客，今宵人月此同圆。

曹谦（5首）

六叔生日

与君南北两飘萍，江海初逢鬓尚青。
不到镜前休认老，病牙拔去正童龄。

关税即时

诸侯四散走仓皇，不见硝烟一战场。
报道南柯犹梦好，风回槐荫小池塘。

见友圈狂晒牡丹

忽晴忽雨暖还寒，梨白棠红都懒看。
人间富贵无关我，哪管东风到牡丹。

入山

平生鲜有看花心，今日无端到处寻。
一路山花嫌不足，湿衣始觉入云深。

尹锡悦

反背龙砂青瓦台，频年折鼎不胜哀。
猛然一觉全家好，不用民间樗散才。

安全东（5首）

登龙门山远眺其震后滑坡遗痕犹在

劫后创痕在，山河自郁陶。
且登千尺险，来领万峰豪。
鹰隼拿云急，烟花叠锦高。
人间真换世，豁目尽风骚。

有忆

黄昏落日照边州，鼓角昏昏月似钩。
忆里弓弦光自满，醉中肝胆赋登楼。
马蹄雪尽犹闻笛，野草霜寒不耐秋。
五十年前多少梦，止今梦醒在渔舟。

过废宅

独对荒芜心事违，劳蛛缀网燕来稀。
羊牛失路家何在，风雨敲窗人未归。
应叹耕锄无后继，定知桑海已全非。
我来如客徘徊久，满目青山怅落晖。

忆边

十年辛苦费雕鞍，行看边营走汉官。
万古尘沙依树直，移锋鼓角入云残。
雪崩大坂死生路，身陷天湖心胆寒。
九悔今无平海诀，漫劳紫极号长安。

读史

盘古天开万古春，红羊历罢史翻新。
疆分陆海凭王霸，代有兴亡孰主宾。
洞里武陵元自好，梦中禹甸几归秦。
风尘眼底乾坤大，谁吊伤心旧子民。

李蔚斌（5首）

拾景

百般红紫压青黄，小径幽衢尽画廊。
怪底愁容妃子面，今人不独爱沉香。

虹湖边小憩

会当清净地，坐此一湖闲。
马踏虹桥外，亭飞驿道间。

水云消溽暑，烟火接绵蛮。
长忆徐霞客，崎岖耐自攀。

游泳并寄笙吟兄

临池俯仰乐其多，身老沧州岂妄过。
聊且蛙游濒近岸，几曾宦海顺从波。
兼天浪有微操作，小目标无大折磨。
始信木兰舟稳渡，燕山诗卷皖江河。

戊戌迎春曲

接阳春早亦拳拳，潜雨潜风各在天。
丝路两开山海外，蓝图一诺世人前。
横塘处有衔枝鸟，垂缕时当饮露蝉。
不为苍生重荐血，槐安梦寄亦徒然。

重过朝天门有感

一片微茫两合流，朝天暝色望难收。
要知廿载三千里，曾住嘉陵更上游。

周达（5首）

访湘阴左宗棠故居

陌上轻尘眼转迷，左公乡里野云低。
两疆力回夸重置，千古名存少并提。
如此风流身系柳，偶然人誉鼎烹鸡。
黄沙远忆斜阳薄，耳畔似闻征马嘶。

石牌要塞有怀

风雨难湮旧血痕，遥看岭下水波浑。
灰飞檣橹硝烟散，骨化虫沙弹洞存。
誓鸟至今衔恨石，怨鹃犹自泣英魂。
抚碑长叹吾生晚，惟向江流酹一尊。

甲辰夏重回武昌偶感

五月江城落雨花，鹤楼高耸晚云遮。
数桥横亘波间漾，二水交流槛外斜。
老去仍为浮海客，梦回还趁摘星槎。
归来总觉心犹远，故里而今不是家。

过韩信故里

清浦游船泛水涯，韩侯故里夜云遮。
四闾但笑王孙辱，一饭终惭漂母赊。
未若陶朱知鸟兔，直如冯铗索鱼车。
古今多少英雄事，聊剩盘中几点茶。

南漳怀古

荆山西望碧嵯峨，千古风流逐逝波。
人赞亡秦三户谚，谁分兴楚两漳河。
巫云郢雪空闻久，和璞随珠未识多。
我亦陆通门下客，车前学唱凤兮歌。

张月宇（5首）

灵谷塔

虫沙幻化冷空山，石勒勋名竟已残。
独有百年凭吊客，惊禽飞下九层栏。

薄暮登岳阳楼

雁序惊寒度闰秋，茫茫湘楚望中收。
楼台雄拓名千载，日月浮沉感一沓。

天旷自逢仙客醉，时艰谁记范公忧？
洞庭湖上涛声起，且待君山砥逆流。

抵杭州

势挟风云自吐吞，高吟久慕典型存。
湖生澹月窥书牖，江挽狂潮落酒樽。
六里堤同苏子步，百年事共伍员论。
相宜欲泛孤山下，认取粼粼一棹痕。

谒陈子昂读书台

追寻履迹此徘徊，竹拥芸窗别径开。
百四篇终君已去，一千年后我方来。
江湖尚作忧时语，堂庙应期济世才。
隐隐风雷涪水怒，涛声长共读书台。

根魂

突兀参差自不群，千丁移此镇山门。
盘虬曾被天风屈，卧虎应缘地火奔。
元化深林埋槁木，时逢慧眼识灵根。
我来尘海摩挲久，遥想洪荒劫后存。

和牛锁（4首）

徒步见晨跑者

杖藜侵晓出，拟踏板桥霜。
木透清冷气，花余浅淡香。
晨光铺道路，竞走见儿郎。
老腿银丝我，当年亦好强。

新春寄友

淑气盈门户，东风舞曼姿。
流光真似水，祝福更如诗。
备酒迎新岁，逢年忆旧时。
飞觞遥一醉，君我两心知。

新冠戏题

紧闭家门暗自伤，了无症状却恹惶。
中招既已成常态，只想年前早点阳。

小院红豆

情到愚痴许自夸，珠红一点也羞花。
诚知小院非南国，但愿相思晚熟些。

李向军（4首）

山居午坐

步廊闲读坐，啜茗亦听蝉。
云静山多趣，花垂犬得眠。
纸中千百事，墟里二三年。
此去谁为道，秋声犹自怜。

村居雨后

雨歇风舒万木新，花闲鸟静道无尘。
偶听三两乡音在，踮脚寻来不见人。

访邵夫子祠初识桂花

问师康节拜祠堂，欣得幽幽满院香。
人道花名方识桂，此行便觉不寻常。

晚至南京

朝过黄河暮过江，秋风任意起苍茫。
初来小写人生义，旅雁经天字一行。

张文峰（4首）

雨水即事

敲窗连夜雨，枝上露新寒。
酒熟无人到，春光不耐看。

冬夜留别王韶关

今夕复何夕，茶香并酒香。
临歧图一醉，把盏话衷肠。
桃杏飞花韵，枫栌落叶章。
岭南风物好，毕竟是他乡。

高铁东站送小师妹赴楚

初阳妆远树，辗转入平途。
墨岭云何厚，熏风味独殊。
李桃同雨露，晋鄂隔江湖。
心护三千里，行舟应不孤。

淇水

小园春已暮，花柳尚余芳。
曲径依修竹，平湖散翠光。

魂牵殷格调，情系卫辞章。
淇水分流处，重来认故乡。

王贵云（4首）

山趣

深林依石凳，坐到日西斜。
树落无名籽，山开有趣花。

藤冲村农家门前见绣球花

人间四月艳阳天，绿水榕蓬别墅连。
抱玉成团招粉蝶，凝珠献瑞续奇缘。
一枝足令芳心动，万片当如暖雪鲜。
小院浮香迷远客，乡邻居此即神仙。

贺陵川中华诗词学会第二届会员大会召开

卓绝风流美太行，烟霞缥缈世儒乡。
凤鸣嘉树金声振，龙啸高天瑞气扬。
诗国兰馨繁九畹，古陵韵响继三唐。
欣看老树新枝茂，秉笔同书锦绣章。

游南海千灯湖活水公园

花木葱茏景物新，风轻日暖乐游人。
镜头仰摄英雄树，桥洞遥瞻魁阁神。
柳展柔条成漫舞，荷擎火炬现微醺。
芒鞋踏处随心醉，不枉身为盛世民。

李国红（4首）

观鱼

清缸无特例，大小任君游。
莫作深渊想，权当厚福收。
濠梁同一乐，云水各千秋。
上下勤求索，无非是自由。

入老干支部群

仰天吟啸数河星，水泻沧浪去意明。
白首入群谋幸福，听人呼你小年轻。

老树吟

默立孤崖上，苍皮日见皴。
风云才过眼，苔藓已随身。

宁可高枝折，难教野性驯。
顺延瓜蔓在，幸未负青春。

入伏

坐对临窗竹，闲翻裸脊书。
眼前唯句读，胸次有丘墟。
和靖梅情敛，刘伶酒兴除。
晚凉风忽至，天意自怜予。

周俊红（4首）

万寿菊

枉着黄袍赭，空言万寿豪。
霜前零落日，未必胜蓬蒿。

癸卯岁暮闻众同门偕游南国桃园有寄

自与东风近，琼枝得气先。
红英还灼灼，绿萼自妍妍。
花接刘宾客，诗成李谪仙。
怪他青鸟使，误我礼高贤。

闻云帆诗友会共青城工作室落成

闻道九仙岭，新成李杜坛。
自怜淇水浅，不及博阳宽。
老眼期陶菊，初心慕楚兰。
何年芝室共，杯酒尽余欢。

过真娘墓

纵是微躯落俗尘，不教泥滓污天真。
魂归月下元神在，客吊风前老泪频。
蔓草香花长作友，剑池古塔久为邻。
游人尽醉春光里，谁识年年墓草新。

申莉萍（4首）

太行崖菊

清姿瘦骨热衷肠，绝壁悬崖是故乡。
不与群芳争沃土，但期医世作良方。

经风雨沐春阳，寄迹危崖着素装。
纵使无人凌绝顶，幽香一缕亦飞扬。

百草园

红黄粉绿一番新，摇曳清香与蝶亲。
别有生机随处见，只凭天性不争春。

秋游武当山即笔

问道何辞晚，驱车上武当。
灵山仙有助，金阙蝶飞忙。
绝顶观风景，依稀似故乡。
感知秋雨意，为我送新凉。

李艺平（4首）

太行红叶

跌宕潮声起，延绵画卷留。
连山如火艳，独占太行秋。

夏夜宿朗月农家院

空山悬朗月，石屋绕清溪。
把酒藤篱下，悠然听鸟啼。

西溪夕照

暖霞笼白日，野柿散清香。
古柏溪头立，支天有脊梁。

观高平乡镇新旧式同台婚礼

绸红纱白舞翩翩，各展风姿礼数全。
不必细论新与旧，两心同处即良缘。

王震宇（5首）

大青山早行

松涛抑还作，岭云匿复吐。
一声山鸟啼，划破青如许。

记梦

幽音杳渺似闻歌，碧沼浮鱼水不波。
废宅空堂尘半掩，残花开尽曼陀罗。

山行见桃花

野径无人任曲盘，东风著力亦艰难。
一枝开在残春外，山北山南共暮寒。

急雨

急雨惊秋早，余寒向晚多。
蒲团方借得，瓦砚自消磨。
绿减经年意，红翻几世歌。
残枰愁失算，半目亦风波。

瓶花

漫与瓶花共晚枝，沉沉帘幕一灯迟。
虚堂虫啮三朝记，覆辙人酣万岁诗。
剑侠剖心因近事，庖神剔骨欲何师。
愁闻海上升明月，咫尺天涯得几时。

吴瑾（4首）

咏菊

已为松竹友，耻作媚时妆。
独立西风里，犹思五柳堂。

中秋月

今古一轮月，苍茫照独吟。
把杯怀旧侣，对影证秋心。

身世凉中过，江湖梦里寻。
惘然无可寄，谁共旅愁深？

咏松

怒展虬枝向九霄，顶风浴雪见清标。
秦皇倚处封侯近，仙鹤栖时入梦遥。
常伴竹梅求质朴，不和桃李竞妖娆。
栋梁信可擎高厦，未许深山寒后凋。

读《淮阴侯列传》

登台大将一时荣，鹿逐中原举世惊。
谁念重瞳难用士，却忘高祖忍分羹。
始终皆是萧何策，生死休从吕雉争。
末路藏弓悲后悟，不应殿上肆谈兵。

宋玉秋（4首）

岁末

律转龙蛇易，时催天地新。
水仙花未放，橘子树先春。
闹市红成海，幽居绿到邻。
初阳曛福字，光影亦相亲。

春日偶题

不识桃花浪，唯期柳叶春。
提篮寻野菜，追鸟过河津。
曾是垂纶者，今为载酒人。
陶然何所惧，烟渚鹤来新。

睡莲

本是仙家女，何由染素尘。
瑶池曾见妒，芳谱更谁论。
不必春风笔，合宜秋水人。
幽幽余一梦，好与月为邻。

听琴

顾曲人何处，题诗水自流。
谁将萧瑟意，洒落寂寥秋。
霜月芦花散，烟光桂子收。
一年听不尽，天地两悠悠。

杨贵全（4首）

回乡

一路乡音最可亲，交谈尽是挂青人。
偶然说到爹娘辈，五十年前是近邻。

古镇行

回乡可算老乡亲，独向曾经路走巡。
一二三街何所遇，陌生楼栋陌生人。

新货郎开小货车沿村道放音频叫卖

香蕉苹果小黄梨，麻鸭白鹅乌骨鸡。
土语声声山应答，翁婆扫码买东西。

返程

桐叶粑粑豆腐干，香甜麻辣一箱安。
家乡风味随车走，纵到天涯也乐欢。

谭柏生（5首）

元夕

元夕银花不夜空，人间烟火古今同。
东风更有高明处，千树清光万朵虹。

友约赴滇

春风有约不书函，携月同斟醉影酣。
若问湘君何所赠，一囊烟雨寄云南。

再登武当山金顶

懒向灵宫问去踪，人喧绝顶道方穷。
忽闻金翼裁云过，或补苍天一角空。

初登天心阁

润土添新阁，城垣涨碧苔。
停云江北去，巡阅楚帆来。

呼伦贝尔大草原之行

云垂碧玉屏，万足踏风馨。
车浪逐潮涌，同争一寸青。

袁爱华（5首）

甲辰中秋前夕诗友相聚分韵得老

每醉依依人欲倒，推杯换盏酒长好。
诗词歌赋共流光，千里婵娟情不老。

秋夜宿禾木村

桑榆暮影烟云去，欲舞丛林草色幽。
一夜星河遥入梦，满天霜语听边秋。

蝉

居高自有悠和洁，万木葱茏无处寻。
聒噪晨鸣不知暑，犹然奏出五弦音。

观洙津渡飞漈灌万顷渡槽

青山碧水白云斜，一坝双堤锁绮霞。
柳拂波纹迎客棹，浪翻涛雪向天涯。
旋耕机耙新阡陌，藤蔓丝缠绿果瓜。
远客停车频摄影，桃林深处是谁家？

甲辰春再访草堂

辗转流离家四方，身如蝼蚁几沧桑。
唐尧虞舜空君梦，六艺五经酬酒觞。
笔底长牵黎庶泪，文章千古世名扬。
诗情一片穿时恋，春色嫣然入草堂。